

## **SVKT Turnerinnen**

---

### **Generalversammlung 9. Februar 2011**

Eusi GV isch am 9. Februar gsi  
4 Gäscht und 38 Turnerinne sind debi  
nach dä Begrüessig hämmer d'Schtimmezählerinne gwählt  
und dänn händs gseit wer alles fählt  
us dä verschiedene Jahresbricht hätt mer chönne entnäh  
s'hätt s'Jahr dur i allne Riege viel z'schaffe gä  
Dänn hätt d'Kassierin ihri Zahle sortiert  
und eus übers Vermöge orientiert  
emal simmer rich gsi öppe wie dä Onassi  
jetzt nur no wie dä Tennisspieler Agassi  
also echli meh Biträg zahle händs gseit  
mir händs mit Fassig treit  
Jetzt aber äwägg vo dä Zahle  
zum Traktandum Wahle  
ä neu Kassierin tuet jetzt euses Vermöge verwalte  
herzliche Dank dä alte  
die isch aber immer no im Vorschtand debi  
sie will so gern eusi technischi Leiteri si  
Bi dä Jugendriege hätt sich au einiges ta  
jedi neu Leiteri würdi herzlich entgäge gna  
oder wänn öpper eusi Frau Vakant ersetze wett  
es isch es gfreuts Pöschkli, mir sind alli so nett  
Dänn händs mit dä Ehrige agfange  
Blueme und Praline sind a die langjährige Turnerinne gange  
s'Ursi isch bi eus als Leiteri scho 25 Jahr  
will mir so flissig mitmached, hätt sie no keis graus Haar  
Dänn hätt s'Gaby ä Laudatio ghalte  
für eini vo dä Uralte  
die hätt gar nüd dra dänkt, dass sie scho 50 Jahr debi  
drum isch d'Ueberraschig natürli gewaltig gsi  
ä riese Schachtle mit dä feinschte Teigware drin  
warum ich das weiss, will ich ebe die Uralt bin  
ich ha doch welle abnäh, das chan i jetzt vergässe  
zerscht werdet jetzt emal Nudle gässe  
s'Gaby hätt eus die nächscht Reis vorgschtellt  
und echli vom schöne Toggeburg verzellt  
mir wettet gern das Jahr ä ABU dure führe  
nur leider wotts niemer organisiere  
wänn also öpper Zit und Idee hätt  
bitte mälde - das wär nätt  
En grosse Batze hämmer vom KTV Präsi übercho  
und dä natürli dankend entgäge gno  
am sächs Minute ab nünü isch dä gschäftlich Teil verbi  
und mir sind no gmüetlich zäme gsi  
händ gässe, diskutiert und glacht  
und eus irgendwänn uf dä Heiwäg gmacht

**Romy Anderhalden**

## **50 Jahre Mitgliedschaft von Romy Anderhalden**

Unsere Romy ist bereits seit 50 Jahren Mitglied bei uns Turnerinnen. Sie wurde an unserer GV mit einer Laudatio und einer Standing Ovation von den Anwesenden geehrt.

Liebe Romy

Vielen Dank für die vergangenen Jahrzehnte, die wir mit Dir verbringen durften. Bleib wie Du bist und vor allem gesund, damit wir Dich noch lange jeden Mittwoch in der Halle treffen.

Für die Turnerinnen

**Gaby Casanova**